

Timotigö Kimbi 1

Polnön Timotigöra Kimbi mutukni alök.

Jim-asa-asari

Timoti sepguli azi yaŋgö namji Juda ambi aka iwiŋi Grik azi. Yaŋön Eisia prowinsnön mala uruŋi meleŋda Kraistkö alaŋi aka malök. Mewö mala Polgö neŋakŋi aka bauköm waŋgiiga mohotŋe liliköba misin nup memba malohot. Polnön lömbötnön memba et al waŋgibapuköra waimanjat keu bohonŋi karöbut mötmöriba Buŋa Kimbi ki ohoyök.

Waimanjat bohonŋi ketaŋi mi böhi takapulakaŋi. Tosatŋan zioz uruŋe kinda keu gongonji kusum sohom eŋgiba malgeri, Polnön yeŋgöra aka galöm meme keu köhöikŋi ohoyök. Böhi mienön Juda yeŋgöreŋ mötmöt aka gölmeŋ mötmöt tosatŋi mindirigetka könaŋamŋini loloŋqaloŋ aiga kewö möt nariba jiba ambazip kusum eŋgiba malget: “Gölme aka yuai pakpak ehakzini, mi bölöŋi akza. Miangöra tosatŋan Suepkö buŋa akingö kapaŋ köla mötmöt asa-asambötŋi qainŋi kun qahö buŋa qem aŋguba nenegö dönqizizin aka soŋgo tosatŋi walöŋda awanöm akze ewö, Anutunön mönö keu miangöreŋ qaköba amöt qem eŋgimangö osima.”

Waimanjat keu bohonŋi kun mi: Denöwö urumeleŋ könagesö galöm köl eŋgiinga törörök Anutugö waikŋi memba möpöseibeak. Polnön miangö qambaŋ keuŋi papianön ohoyök. Mewöŋanök zioz galöm, babafi aka nup meme ambazip tosatŋan denöwö aka malgetka dop köljawi, miangö keu areŋi mi jim asariba ohoyök.

Teteköŋe keu bohonŋi karöbutŋi miangöreŋ Timotigöra goro keu tosatŋi ohoyök. Undumŋi yaŋön mönö denöwö Jisös Kraistkö welenqeŋe ölöŋŋi aka mötnarip ambazip kambuŋi kambuŋi eŋgöbisiba bauköm eŋgiiga dop kölmawi, miangö goronŋi ohom waŋgiyök.

Buk kiangö bahönŋi bohonŋi 3 mi kewö:

Keu mutukni 1.1-2

Ziozgö nup meme yeŋgöreŋ jimkutukutu 1.3–3.16

Timotinön nupŋi memapkö jimkutukutuŋi 4.1–6.21

1 ¹Anutu, Amötqeqe Tonini aka Kraist Jisösnöŋ galöm köl neŋgimapkö jörömqöröm al mamböt ak waŋgizini, yetköŋ Pol nöŋgöra jim kutuba kuŋguba melaim niŋgiyohotka aposol maljal. Kraist Jisösgö jijtjememe mewöŋi aka göbuk keu eraum mötpitköra kimbi ki ohozal.

²O Timoti! Gi urugi meleŋda Jisös möt nariba mötnaripkö nahön sorokni aka maljan. Iwi Anutu aka Kembunini Kraist Jisös, yetköŋ mönö ak kömumba kalem möriam gihiyohotka luainöŋ malman.

Enjololoŋ kusum eŋgibepukö galöm meme keu

³Masedonia prowinsnöŋ anmamgö ahali, nalö miaŋgöreŋ kewö jim kutum gihial, ‘Gi mönö Efesus sitinöŋ toroqeba mala urumeleŋ kambu bauköm eŋgimakŋan. Tosatŋan mötnaripkö keu kemaŋi tosatŋi kusum sohomakzei, mi toroqeba akepuköra galöm mem aŋguba malme.’ Mewö jim kutum eŋgiba malmangöra jial. ⁴Tosatŋan bem sambanŋi sambanŋi aka ambösakon yeŋgö qet areŋi areŋi mi teteköŋi qahö eraum mötketka supapköiga aŋgururuk aka keu qeqesi omaŋi asuhui mötmörimakze. Yeŋön uruŋini miaŋgöreŋ ala sohobepuk. Keu sinŋi sinŋi jiji mewöŋi mi qahöpmahöp bauköm eŋgimapmö, Anutugö malmal areŋi mi kewö ahöza, ‘Kunŋan Jisös möt nariba uruŋi meleŋniga yaŋön mönö i amöt qem waŋgiiga letotma.’ Merak mewö ak eŋgimangöra kunbuk uruwahöt keu jim gihizal.

⁵Jim kutum gihizali, miaŋgö tohotŋi mi urujöpak. Nöŋön urukalem ahumapköra bim qeba kewö jim tuarim eŋgiba malmangö kuŋgum gihizal: Yeŋön uruŋinan sarakŋi ahömapköra galöm köl aŋgugetka mötmöt bölöŋan mi qahö gwözöŋma. Qahö gwözöŋniga Anutunöŋ saŋep alakzawi, mi urukezapŋinan ölöp möta malme. Mewö mala Kraist törörök möt narigetka Anutunöŋ mönö urukalemŋi uruŋine ali ölöp ahumakŋa. Urujöpak miaŋön sutŋine ahumapkö kapaŋ kölakzal.

⁶Tosatŋan Anutugö malmal areŋi mi siŋgiba janjuŋ aka oyöŋdewedewet keu omaŋi omaŋi laŋ jimakze. ⁷Yeŋön Anutugö Köna keugö böhi malbingö mötzemö, nanŋinak keugö könaŋi qahö möt asariba mesohol kölayök jimakze. Öne ambazip jeŋine awösamkakak kinda keu laŋlaŋ köhöiba jiba bim qemakze.

⁸Anutugö Köna keu miaŋön mönö ölöp sorokŋi akza. Mi könaŋangö dop törörök kusum aŋguba wuatangöinga ölöp möhamgöm neŋgimakza, mi mötzin. ⁹Anutu Köna keuŋangö könaŋi mönö kewö möt yaköme: Mi ambazip solanŋi diŋdiŋi yeŋgöra aka qahöpmö, Anutunöŋ mi ambazip goŋgoŋi mindiŋgöm eŋgimapköra aka ali ahöza. Tosatŋan goŋgiba kewö ahakze: Iwilele jaubatbat aka keu qeba yaŋgiseŋ qakŋe aum

^a 1.2 Apo 16.1

jesöksök ahakze. Anğöjörak aka siŋgisöndokŋinambuk mala töndup Anutu nesampurek ak waŋgigetka uruŋini tölöhoba nöŋŋan malje. Iwinamŋini aka tosatŋi enğuget kömumakze.

¹⁰Serowilin ahakze. Sodom taonöŋ akeri, miaŋgö dop köna oŋgita azi nanŋirök aka ambi nanŋirök amimakze. Ambazip mem bölim enğimegöra qeraköba jöhömakze. Keu munen jimakze. Keu jiba jöjöpaŋ keunöŋ jöhöba töndup tilipkömakze. Anutunöŋ ahakmeme diŋdiŋi akingöra Ölöwak Buŋa neŋgiyöhi, mi iŋi waiŋi aka memba miaŋön qetalakze. Anutugö Köna keu miaŋön ambazip mötnaripkö köna diŋdiŋi siŋgimakzei, mönö i mindiŋgöm enğimapköra aka ahöza. ¹¹Anutu, oyaenkyoaen Toŋi yaŋön mötnaripkö köna diŋdiŋi mi Buŋa keunöŋ ali ahöza. Nöŋön Ölöwak Buŋaŋi aködamunŋambuk jim sehimamgö möt narim niŋgiba Buŋa keuŋi mi al niŋgiyök. Mewö.

Polnöŋ Kembu kalem möriamŋaŋgöra möpöseiza.

¹²Kraist Jisösnöŋ uruni kewöriga nupŋi pöndaŋ memamaŋgö dop nehi dop köliga nupŋi niŋgiiga memakzal. Nup memamgöra kukösum niŋgiba mala kotzawi, miaŋgöra Kembunini möpöseiba maljal. ¹³^bNöŋön mutuk Jisös mepaiköba alaurupŋi ilita sesewerowero könöpuk ak enğiba malal. Mewö malalmö, yuai mi Jisös qahö möt nariba silebile tönpin mala laŋ aka memba malal. Siŋgisöndok mewö aka malalaŋgöra mönö ak kömum niŋgiiga kölöŋaiba letoral.

¹⁴Kembuninan kalem möriamŋi niŋgiba keleŋmaleleŋ mokoiga nöŋgö qakne öŋgöyök. Mewö öŋgöiga mötnaripnan asuhuiga urujöpakö kondotkondot Toŋi Kraist Jisös miwikŋaial. Yambuk qekötahöba kinda urukalemŋi buŋa qem aŋguba ambazip tosatŋi urunan jöpaköm enğimakzal.

¹⁵Nöŋön ambazip tosatŋi pakpak enğonŋita siŋgisöndokö ambazip yengö sutŋine ketaŋamŋini aka malal. Mewö malalmö, Kraist Jisösnöŋ siŋgisöndok ambazip amöt qem neŋgimamgöra aka gölmenöŋ erök. Keu kötŋi mi nöŋgöreŋ öŋŋambuk ahök. Miaŋgöra keu kötŋi miaŋön mönö pöwöwöm köhöikŋi akza. Mi ambazip körekmakörek möt nariba aŋön kölbinaŋgö dop akza.

¹⁶Siŋgisöndokö ambazip yengö ketaŋamŋini aka malalmö, Kraist Jisösnöŋ ni kewögöra ak kömum niŋgiyök: Yaŋön nömbuk uruluai qakŋe amöt qem niŋgiba Anutugö uru tandökŋi aukŋe asuhumapkö möt köhöiyök. Nöŋgö könane ambazip tosatŋan Jisös möt narimei, tandökŋi mi yengöra kondel enğimamgö mörök. Mi kondel enğiiga ölop amqeba uruŋini meŋjda malmal köhöikŋaŋgö buŋaya akŋe. ¹⁷Ak kömum niŋgiyöhaŋgöra aka Anutu möpöseimakzal. Yaŋön Kiŋ Kembu teteköŋi

^b 1.13 Apo 8.3; 9.4-5

qahö aka malma. Anutu mohotŋan qahö göröŋ qeiga kaisongolomŋi qahö ehakzin. Nöŋön yaŋgö qetbuŋaŋi nalö dop möpöseibiga teteköŋi qahö aködamunŋambuk aka ahöma. Keu mi ölja.

¹⁸O mötnaripkö nahöni Timoti! Mutuk kezapqetok keu tosatŋi göhöra jigeri, keu miaŋön kötöŋgöm gihiiga ölop aködamungabuk aka malman. Keu miaŋgö dop kewö jim kutum gihizal: Göŋön mönö malmal sarakŋi malmangöra bim köhöikŋi qeba malman.

¹⁹Bim qeba miaŋgöreŋ mötnaripki söroräuba sohobapuköra mönö töp meman. Urugi köyan köl aŋgunöŋga mötmöt bölöŋan qahö gwözöŋniga Anutunöŋ urukezapnöŋ saŋep alakzawi, mi ölop möta malman. Ambazip tosatŋan uru köyankölkölŋini mosöta laŋ malgetka mötnaripŋinan löwöriba köhömuŋi aka pömsöm qeyök. Waŋgenöŋ köwet töromnöŋ kuŋguba jömgözawi, mönö miaŋgö dop kumkanjaŋ aka böliget.

²⁰Mötnaripŋinan pömsöm qeyöhi, yeŋgö sutŋine azi yahöt qetŋiri Himeneus aka Aleksander maljahot. Nanak mindiŋgöm etkimangö osiba uruŋiri meleŋmahotköra i Satangö böröŋe al etkial. Al etkibiga Satangö kukösumŋi ahakmemeŋiraŋgö dop möta uruŋiran sihimbölögöra löwöriiga meleŋda mepaqepaik kunbuk qahö akahorak. Mewö.

Buŋa nupkö köuluk areŋ

2 ¹Yuai bohonŋi mi köuluk nup. Nöŋön miaŋgö uruwahöt keuŋi jiba uruŋini kewö kuŋguzal: Injini mönö ambazip körek pakpak engöra köuluköba kapaŋ köla uleta Anutu qesim waŋgiba saiwap jiba malme.

²Kiŋ azi kembu aka gawmangö galöm ambazip könaŋi könaŋi yeŋgöra aka köuluköba malme. Mewö kötöŋgöm engigetka diŋdiŋanök galöm köl neŋgigetka luai qakŋe guŋböŋjönjön malbin. Mewö mala Anutugö jitŋi wuatangöba ahakmeme diŋdiŋi aka memba malinga aködamunŋambuk ahakŋa. ³Köuluk nup mewöŋi miaŋön ölop sorokŋi akza. Mi Anutu, Amötqeŋe Toninaŋgö jemesoholŋe ölop dop kölja. ⁴Yaŋön ambazip körekŋan Buŋa keu öljŋi möt kutuba uruŋini meleŋgetka amöt qem engii letotmegöra jitsihitŋi mörakza.

⁵Anutu mohok-kun ahöza aka ambazip Anutubuk mindirim neŋgimapköra azi mohok-kun mewöyök ahöza. Azi mohot Jisös Kraist yaŋön mönö mi köhöiiga tosatŋan mi osimakze. ⁶Yaŋön siŋgisöndok ambazip pakpak neŋgö sohopeni memapköra malmalŋi köleŋda mosörök. Buŋa keu mi Anutunöŋ nalö ali tosatŋan nalö törorök miaŋgöreŋ könahiba naŋgöba jim asarigetka neŋgöreŋ kayök. ⁷Miaŋgöra aka Anutunöŋ aposol akŋamgö kuŋguba melaim niŋgiiga kantri dop lilikömakzal. Ambazip Jisös möt narimegöra Buŋa keu ölbölŋi jim asariba kusum engiba uruŋini kuŋgum engimakzal. Könani mewö jiba munen kun qahöpmö, keu ölja mewö jizal. Mewö.

Azi aka ambi yeṅgö malmal areṅini

⁸ Mianṅöra jitsihitnan kewö jizal: Azi eṅön mönö pöndaṅ miri dop tokoba köuluk nup töp memba malme. Yom kazik aka aṅgururuk mosötketka uruṅinan sarahiiga ölop böröṅini mem wahöta Anutu köulukömakṅe. ⁹^d Ambiyö qambaṅ keuṅini kewö jizal: Eṅön mönö kinisöröṅini löṅgöta silenṅini törörök turuba malme. Opo söro sorokṅi aködamuṅambuk mi mosötmö. Nöröp juṅṅini qeba gawasu könaṅi könaṅi kude ala minṅiṅda öṅböṅ meme. Kösasorom me goul miaṅön kude meṅölöm aṅgume aka löṅgölöṅgöt söṅgöröṅi ketanṅi miaṅön memba aiwelikqaiwelik kude akṅe.

¹⁰ Aködamuṅṅini ölnṅi mi ahakmeme ölopṅi. Ambiyö Anutugö jitṅi oṅgitpinbukö keṅgötṅini möta qetṅi jim aumakzei, eṅön mönö nup ölopṅi ölopṅi jeṅep kinda memakṅe. ¹¹ Azinöṅ kusum eṅgetka ambi eṅön mönö uruṅini memba et al aṅguba Buṅa keu ösöṅ möta nesilam qakṅe takpararak aka jitnöṅ söhöp kude meleṅmemö, mi urukönömṅine ala malme.

¹² Ambiyö azi galöm köla kusum eṅgimegöra nöṅön 'Oṅ!' qahö jizalmö, tokogetka ösöṅ keu böc tatme. ¹³^e Anutunöṅ mutuk Adam miwikṅaiba yaṅgö andöṅe Iw (Ewa) miwikṅaiyök. ¹⁴^f Mokoleṅnöṅ Adam qahö tilipköyökmö, ambi mi tilipköm waṅgiiga keu oṅgita ṅiṅgisöndok ahök. ¹⁵ Töndup ambi yeṅön nup areṅini wuatṅgöba morö memba Kraist möt nariba ahakmeme sarakṅi wuatṅgöba urumeleṅ alauruṅṅini urunöṅ jöpaköm eṅgiba ösöṅ malme ewö, Anutunöṅ mönö ölop amöt qem eṅgiiga letota Suepnöṅ öṅgöme. Mewö.

Ziozö nup galöm yeṅgö keu areṅ

3 ¹ Kunṅan urumeleṅ könaṅesögö uru galöm pasto akṅamṅö ak waṅgizawi, yaṅön mönö nup sorokṅi aködamuṅambuk miwikṅaiba. Keu mi öc töhöṅṅa. ²^g Mianṅöra urumeleṅ könaṅesögö uru galöm nupköra mönö azi kewöṅi möwölöhöba kuṅgugetka dop kölma: Kungö silenö köpösihitkö keuṅi qahö, ambi mohot-kungö aṅṅi, kekpurikṅi qahö, ahakmemeṅi törörök galöm köc aṅguiga göda qem waṅgimakze. Yaṅgöreṅ kamei, i ölop köc öroba köyan köc eṅgiba mötmöt törörök kusum eṅgimakza.

³ Kunöṅ o köhöikṅi nemba bim laṅ qeba aṅgururuk aka moneṅ membagun memamṅö köpösöṅgömakzawi, i qahöpmö, kunṅan ölop ambazip mutulaṅgöba mökölim eṅgiba guṅböṅjöṅjöṅ ak eṅgimakzawi, mönö azi mi kuṅgume. ⁴ Kunöṅ nanṅi anöm-moröuruṅṅi ölop galöm köla goro eṅgiiga nahönböraturuṅṅan göda qem waṅgiba keuṅi pakpak tem köla

^d 2.9 1 Pitö 3.3 ^e 2.13 Jen 2.7, 21-22 ^f 2.14 Jen 3.1-6 ^g 3.2-7 Tai 1.6-9

maljei, mönö ia kuŋgugetka kinma. ⁵Galöm azi kunŋan nanŋi saiwaurupŋi galöm köl engimamgö qötötangöza ewö, yaŋön Anutugö urumeleŋ könagesöurupŋi mönö denöwö köyan köl engibawak? Mi mönö osibawak.

⁶Azi kunŋan nalö köröpŋi uruŋi meleŋda zeŋ kinjawi, yaŋön ölöp kutukutulaŋ galöm nup memerjina aka malma. Kunŋan nalö töröpŋi uruŋi meleŋda an köl kam köl aka tiwokmawok aka töptöpŋe qeba sileŋi memba öŋgöbapuk. Bölöŋaŋgö Toŋan kezapjupjup aiga Anutunöŋ keuŋi jim teköba közöl waŋgii erök. Miaŋgö dop engö galömŋinan sileŋi memba öŋgöiga Anutunöŋ i Satan ewö jim teköiga etpapuk. ⁷Galöm kunŋan urumeleŋgö kopa yeŋgö sutŋine qetbuŋa ölöpŋi qahö bisibawak ewö, ambazipnöŋ i laŋ jim böligetka Bölöŋaŋgö Toŋan mötöp simbanŋi ali miaŋön töteköi qeiga etpapuk. Mewö.

Ewanjelis aka Buŋa nup ambazip yeŋgö keu

⁸Buŋa nup ambazip^h yeŋön mewöyök ambazipnöŋ göda qem engimeaŋgö dop taŋörakŋini qahö aka malme. Tosatŋan keu jöl yahötyahöt jiba wain o gwötpuk nembra möndömöndö qakŋe injarere mala moneŋ yuaigöra kapaŋ kölakzei, i mönö kude kuŋgum engigetka kinme.

⁹I qahöpmö, ambazipnöŋ mötnaripkö keu öŋŋi asa-asambötŋi Anutunöŋ indelöhi, mi nöm tik memba miaŋgöreŋ qekötahöba uruŋinan tölöhobapuköra galöm mem aŋguba sarakŋi maljei, mönö ia kuŋgum engime. ¹⁰I mewöyök mönö mutuk kewöt engigetka keu jizalaŋgö dop köhöiba kingetka dop kölma ewö, mönö ölöp kuŋgum engigetka kinda Buŋa nupkö ambazipŋini aka malme. ¹¹Yeŋgö ambiurupŋinanⁱ mewöyök ambazipnöŋ göda qem engimeaŋgö dop taŋörakŋini qahö aka andöqeŋe keu jitnöŋ yöhösaŋ qahö jiba malmemö, kekpurikŋini qahö mala yuai pakpak memburik-qemburikŋini qahö memba malme.

¹²Buŋa nup azinöŋ mönö ambi mohot-kungö aŋŋi aka nanŋi anöm-morö aka welenqeŋeurupŋi ölöp galöm köl engimakŋa. ¹³Buŋa nup ambazip nupŋini ölöpŋanök memakzei, ambazipnöŋ i göda qem engigetka qetbuŋa ölöpŋi miwikŋaime. Mi miwikŋaiba ölöp awösamkakak kinda ambazip uruŋini kuŋguba Jisös Kraist möt naribingö keu mi köhöiba jimakŋe. Mewö.

Anutunöŋ Buŋaŋi asa-asambötŋi indelök.

¹⁴O Timoti, nöŋön zilaŋ göhöreŋ kaba gekŋamgö jörömqröm al mamböt akzalmö, töndup kimbi ki göhöra ohozal. ¹⁵Nalöni qeköriiga

^h **3.8** Dikon mi azi aka dikones mi ambi, yeŋön pasto qöhöröŋine bauköba nup memba urumeleŋ kambu köyan köl engiba Buŋa keunöŋ gumohoba silegö nup tosatŋi memba miaŋön naŋgöm engimakze. Ewanjelis me urukuŋgukuŋgu ambazip yeŋön sel yaigepŋe kinjei, yeŋön uruŋini meleŋmegöra Buŋa keu kusuba miaŋön uruŋini kuŋguba goro engimakze. ⁱ **3.11** Buŋa nup ambi aka Buŋa nup azigö anömŋi yeŋgö jimkutukutuŋini jiza.

kabilenbuköra mutuk kimbi ki kewögöra ohobi kaza: Gi Anutugö urumelen könagesourupni denöwö galöm köl enjinönga ahakmemerjanan diŋgiba ölöwakjawı, mönö qambaŋ keu mi oyoŋda mötman. Anutugö könagesourupni neŋön Anutugö mindimindiri zioz selni akzin. Malmal Tonji yaŋgöreŋ qekötahöinga mindirim neŋgiiga miri dop tokoba keu ölni jim sehimakzin. Keu ölnan böliba ösumni etpapuköra miaŋgö wötŋi aka tandöni akzin. ¹⁶ Anutunöŋ amötqeqegö könani asa-asambötŋi indelöhi, neŋön Buŋa keu mi möt asariba kewö jim miwikŋaimakzin:

Buŋa Tonji yaŋön nanŋak gölme azia aka sutnine asuhuyök. Asuhuiga keu jakeŋe albıngö keuŋi laŋ jarum bibihigetka Uŋa Töröŋan könani solanŋi aukŋe kondelök. Mi kondela meiga Kembu aka wahöta Suep garata galöm köl enŋgiiga aködamanuŋi uba eket.

Mi eketka Anutunöŋ waŋgiri Suepnöŋ öŋgöba Anutubuk tata galöm köl neŋgimakza. Galöm köl neŋgiiga Buŋa keuŋi mi kantriŋi kantriŋi liliköba jim asarigetka gwötŋuk yeŋön gölme dop möt narim waŋgimakze.

Mewö jim miwikŋaininga ölna aködamanuŋambuk akza. Mewö.

Keu muneŋi kusum enŋigetka eŋololon akza.

4 ¹ Anutugö Uŋaŋan keu kewö jim asariiga törörök möt yaközın: Gölmegö nalöŋan tekömamgö akjawı, nalö miaŋgöreŋ ambazıp keleŋmaleleŋ yeŋön mötnarıp mosöta Kembu andö qeba ömewöröme yeŋgö böröŋine geme. Mewö gegetka ömenöŋ sölölohöba kusum enŋimakzei, mönö yeŋgöreŋ mötmöt wuatangöba eŋololon aka siksauk malme.

² Siksauk mi kewö asuhuma: Tosatŋan urumelen silesile aketka Satanöŋ aiwesökŋi uruŋine ain könöpŋambuknöŋ qekötahöba urukezapŋini gwözöŋniga köhömuŋi aiga keu muneŋi laŋ jim sohomakze. ³ Yeŋön ambazıp kewö kusum sohom enŋimakze, 'Urumelen ambazıp enön mönö awanöm aŋgömeme kude akŋe aka nene tosatŋi kude namba malme.' Mewö kusum sohom enŋimakzemö, Anutunöŋ nene pakpak mi nemingöra miwikŋaiyök. Mi ambazıp Anutu möt nariba keu ölni möt yaközini, yaŋön mi kötuetsköiga ölöp saiwap jiba nemingöra al neŋgiyök.

⁴ Anutunöŋ yuai pakpak miwikŋaiyöhi, mieŋön mönö ölöŋni akze. Mi andö qebinangö dop qahöpmö, yuai al neŋgimawi, mi ölöp saiwap jiba buŋa qem aŋgubin. ⁵ Yuai ambazıp jeŋine dönqizinŋambuk akawak ewö, mi mönö ölöp Anutugö keu jiba köuluköinga ösumŋan walöŋda domamöt qeiga sawölŋi akŋa. Mewö.

Kraist Jisösgö welenqeqe ölöŋni mi kewö:

⁶ Göŋön urumelen ambazıp mewö kusum enŋiba mala Kraist Jisösgöreŋ Buŋa nup meme azi ölöŋni aka malman. Göŋön Buŋa keu wuatangöba

mala kotzani, mi tosatji kusum engiba nangak mewöjanök keu ölöpnj mi aka mötnaripkö qambañ keu pakpak oyondä mötmöriba mianjön urugi gumohom anguba malman. ⁷Gölme ambazipnönj bem samban keunji oyondewedewet jigetka Anutugö Buña keunönj böbölohot akñamgö akzawi, mi mönö yaköriba andö qeman. Mi andö qeba Kraist ewö aka malmangöra urugö kölguliguli aka malman.

⁸Anutunönj malmal nalö kewöñe gölmenönj maljini, mi kötuetköm nenjiiga könangep oyaenköyaen malbingö jöhöjöhö alök. Mönahot angolat mi boromdökñanök sile guliguligöra bauköm nenjiiga eretji akzapmö, urugö kölguligulijni mi tandönini bohonji akza. Miangöra urugö likepji pöndañ kölguliba malnönja mianjön mönö yuai pakpak miangörej bohon köla nangöm gihimakja. ⁹Keu jizali, mi ambazip körekñanök möt angön kölbinangö dop pöwöwöm köhöikñi akza. Keu pöwöwöm köhöikñi kun mi kewö,

¹⁰“Anutu malmal Tonji yanjön ambazip körek pakpak amöt qem nenjimamgö mötza. Urunini melenja möt narim wangimakin ewö, mönö ölña amöt qem nenjimakja. Mewö möt narizin. Nini tosatjan mewö asuhumapköra jörömqröm mewöñi Anutu al wangiba kindä nupñi memba silenini qeba aum-mörimakzin.”

¹¹Ambazip keu miangö dop aka memegöra jim kutuba kusum engiba malman. ¹²O Timoti, kunönj sepgwölö maljanangöra memba et al gihibapaköra mönö mötnarip ambazip sutjine silik ölöpnj kewö kondel engiba malman: Keu ölöpnjanök jiba ahakmeme diñdijni wuatangöba ambazip törörök jöpaköm engiba malman. Mötnaripkö kölguliguli pöndañ memba Anutugö nupñi mem sorokönönja miangöra möt narim gihiba malme. Mewö sarakñanök aka menönja ambazipnönj ölop göda qem gihigetka malman.

¹³Mönö pöndañ Urumelenjö Buña Kimbi mi jegep oyondä kapañ köla jim asariba könagesö urujini mianjön kuñguba kusum engiba malman. Nalö sutñi kiangörej mewö aka malnönja nöñön kabiga dop kölma. ¹⁴Jitjememe yenjön böröñini göhö qake ala köulukögetka Anutugö kezapqetok keu göhöra asuhuiga Anutunönj nup memegö mötmöt kalem gihiiga uruge ahözawi, mi kude köyatimanmö, miangö qakñe nup memba malman. ¹⁵Kude köyatimanmö, Buña Kimbi oyondä jim asariba kusum engiba malman. Yuai karöbut mi mönö kapañ köla jegep kölguliba malman. Tanqañ qahö akñan ewö, urugahö töhötmöriamñan mönö qariiga köhöiba awösamkakak akñani, mi körekñan ek kutume.

¹⁶O Timoti, mönö nangi uru silegi galöm kölguliguli anguba urumelenj nup törörök kusum engimangöra galöm mem anguba malman. Mewö aka malman ewö, mönö nangi oyaenköyaen ak anguman aka keugi mörakzei, mi mohotñe oyaenköyaen ak enjinönja Suepnönj öngöme. Mewö.

Malö aka ambazip namñi mi kewö galöm kölguliguli:

5 ¹Azi namñi mi köhöikñanök kude mindiñgöba jim wangimanmö, iwiwi ewö qambañ keu ösön jinönja mötma. Azi sepgwölö mi

darumungi ewö ak engiba malman. ²Ambi namji mi namurupki ewö qambaran engiman. Ambi seram mi nenurupki ewö ahakmeme saraknji wuatangöba göda qem engiba malman.

³Malö tinitosolomnji qahö mi mönö gödaqeqe qakne ak engiba malman. ⁴Malö kungö isimoröurupnji malje ewö, yejön mönö mutuknji aka bohon köla i galöm köl wangime. Anutunöj jim kutum nenngiyöhi, yejön mönö miangö dop nanjini saiwaurupjni köyan köl engibingö könaji mötme. Iwinamurupninan mutuk nalö köröpni köyan köl engiba malgetka yejön miangö kitipnji melenja tosanjini meköm engigetka Anutugö jeje dop kölma.

⁵Malö ambi ölnji, tinitosolomnji qahö nanjök maljawi, yejön mönö jörömqörömni Anutu al wangiba i sundan dop sungem asak qesiba köuluköm wangimakza. ⁶Yejön mewö maljapmö, ambi malö tosatjan urunjan könöwiiga sihim kömbönanjanangö dop yuai lanlangöra böröjan suhumakzei, yejön gölmenöj silebuk maljemö, töndup köhömuji akze. ⁷Miangöra malö yejön silejine köpösihitkö keunji qahö ahöi malmegöra mönö mewöyök jim tuarim engiba malman.

⁸Kunjan nanji tinitosolomurupnji qahö köyan köla engömosöri garömisinj maljei, yangö ahakmemejan mönö bölim teköza. Yejön Kembu möt narizawangö keunji mi silikjan qan köla urumelenjö kopa tandök ongita böliqöliba malja.

⁹Urumelenj könagesö enjön malö tosatji kutukutulanj aka köyan köl engimakzei, malö kunjan yejögö arejnöj kangotmapköra qeqesi alma ewö, ambi mi mönö kewötme. Kewötketka kewö asuhuiga iyök mönö qet arej miangörej toroqeba ohoba alme: Kunöj yambuji (yaranji) 60 ongita azi mohotkö anömja malök. ¹⁰Mewö maliga tosatjan könangöngöra kewö nangöba jimakze: Yejön nup ölöpnji ölöpnji memba mala morö galöm köla goro engiiga qariget. Ambazip kianji mirine köl öröba köyan köl engiiga Kraistkö alaurupnji saraknan kagetka uzinjini sanjonja esuhuba yaka tawej engiba malök. Wahöjalinj uruje malgeri, mi mem ölöwaka nup ölöpnji pakpak memangöra uruji pöndanj jöhöba jegep kinda malök. Malö mewöjni mönö arej papianöj ohoba köyan köla malme.

¹¹Malö ambi namji qahö, yejögö qetjini mönö qet arej papia miangörej kude alman. Mi albanak ewö, yejögö sihim kömbönanjanan könöp jeiga azi kunbuk membingö mötmötjnini ahum köhöiiga Kraist silekmalek ak wangiba zioz nup mosötpepuk. ¹²Mi mosöta mutuk Kraist tem kölböngöra jöjöpanj keunjini aukne jim jöhögeri, mi qegetka pömsöm qeiga Kraistnöj keunjini jim teköba gamu qem engiiga önewat lanj malbepuk.

¹³Önewat lanj mala toroqeba kewö bölibepuk: Mirinj mirinj lanj liliköba nalö ayuhumegö könaji möt angön kölbepuk. Toroqeba böliba luasö keu lanj jiba keu bapne qahö anda nanjini imbi-imbi wuatangöba nup meme

tandöktandök lilikqilik akepek. Inöj wainöj laj möndöba nup ölni qahö memba tosatnji yengörej yuai mem sohobepuk. Keu tosatnji yengörej yuaia qahöpmö, töndup mi öne laj jim sehibepuk.

¹⁴Mewö akepeköra sihimni kewö möta jizal: Malö ambi namni qahö yejön mönö azi memba morö memba nup mirinjini galöm köla malgetka dop kölma. Mewö aketka tuarenjojninan jim bölim nenjimamgö könani jaruba mi qahö miwikjaima.

¹⁵Malö tosatjan galöm qahö mem anguba lök Kraist andö qeba eta Satangö könane wuatangöba malje. ¹⁶Urumelej könagesö nejön mönö malö ambi ölni, tinitosolomjini qahö maljei, mi köyan köl engbingöra ahakzin. Miangöra mötnarip ambi kungö tinitosolomurupjan malöya akzei, yanön mönö mi köyan köl engiba malma. Miangö lömbötjan mönö zioz kambu engö qakjine kude öngöma. Mewö.

Ziozgö jitmeme mi kewö köyan köl engibin:

¹⁷Jitmemeurup urumelej könagesö ölop galöm köl engimakzei, ejön mönö miangö likepni melenä gödaqege öngöngöni kondel engiba malme. Yengörejök tosatjan Buja keu jim asariba kusum engimakzei, miangöra mönö kötönjini toroqeget öngöi engiba malme. ¹⁸Buja Kimbigö keu kunjan miangö könani kewö jiza,

“Wit padigö kötji aka kamböni mendenbingöra bulmakau aziñi wangitketka padi kambu qakje tiba tözözamgömakzawi, yangö numbuñi mönö kude muzupköme. Mewö gumohom wangigetka ölop nene kitipni neiga dop kölma.”

(Miangö dop kiamnöj böröjañ memba sömbup meköi qegetka kitipni wangiget neiga dop kölma.) Keu kun kewö ahöza,

“Kunöj nup meiga tosatjan töwanñ wangigetka dop kölma.”

¹⁹^kJitmeme kungö sileje keu laj ala jim wangigetka yahöt me karöbutjan mi qahö nangöbeak ewö, i mönö keu jakeje kude alman.

²⁰Denike yejön singisöndok ahakzei, göjön mönö i aukje tembula jim enginönga körek pakpak keugi mi möta singisöndok akinbukö kenjötnini möta galömjini mem angumakje.

²¹O Timoti, keu ohoba jim kutum gihizali, mi mönö tem köla wuatangöba malman. Azi me ambi kun kude ek soriba tosatnji kude qepureim engiman. Miangöra kungö keunji mi qeljine laj kude jöhöman. Ambazip körek pakpak mönö örörön kewöta ak engiman. Mewö akjangö keunji mi mönö Anutu, Kraist Jisös aka Sup garataurup sarakni yengö jemesoholjine jiba mi jöjöpañ keunöj jöhönönga mötpi dop kölma.

²²Tosatnji yengö singisöndokjinan göhö qake öngögetka gamu miwikjaibanbuk. Miangöra kunjan “Kembugö nup memam,” me

† 5.18 Dut 25.4; Mat 10.10; Luk 10.7 † 5.19 Dut 17.6; 19.15

“Urumeleŋ kambu toroqemam,” jizawi, yaŋgö könaŋamŋi mutuk qahö kewöta börögi zilaŋzilaŋ yaŋgö qakŋe kude ala kötuetaköm waŋgiman. Nangak sarakŋi malmangöra mönö galöm köl aŋguba malman.

²³O Timoti, gi nalö tosatŋi kawöl ahum gihiiga “Yaiŋmaiŋ!” qeta ahakzan. Miaŋgöra mönö oyök kude nemanmö, wain o tosatŋi mewöyök nenöŋga kömönŋgoki bauköiga amqema.

²⁴Keu kun kewö: Ambazip tosatŋan siŋgisöndok aketka zilaŋ aukŋe asuhugetka ambazipnön eka qeljiŋe jim tekögetka nalö kewöŋe gamuŋinambuk kinje. Mewö kinjemö, tosatŋan siŋgisöndok aka tölapköba mala könaŋep Anutugö jeŋe aŋgotketka aukŋe asuhui jim teköm eŋgima. ²⁵Ambazip nup ölöpnji aködamanŋambuk memakzei, nup miaŋön mewöyök nalö kewöŋe aukŋeyök ahöza. Nup ölöpnji tosatŋi aukŋe qahö ahöbeak ewö, mi mönö mewöyök tölapŋe ahöbingö osiba könaŋep asuhugetka ekin. Mewö.

Welenqeŋe yeŋgöreŋ qambaŋ areŋ

6 ¹Welenqeŋeurupŋini pakpak toŋinaŋgö mötöp bisiba nup töwaŋini qahö memakzei, eŋön mönö tourupŋini iwilele laŋ kude ak eŋgimemö, gödaŋeŋe pakpak kondel eŋgibingö dop eŋgeka malme. Eŋön mönö tosatŋan Anutugö qetŋi mepaiköba jibepuköra kapaŋ köla kinme. Anutugö Buŋa keuŋi ambazip kusum eŋgiinga mi eŋgö ahakmemeŋinaŋgöra aka andö qegetka bölibapuk. ²Tourupŋini tosatŋan urumeleŋ alaurupŋini akzei, miaŋgöra mönö gödaŋeŋeŋini mötket eretŋi akapuk. Mewö qahöpmö, tourupŋini welen qem eŋgigetka nupŋini ölöwahakzawi, yeŋön Kraist möt narigetka wölböt ala ak eŋgigetka miaŋgöra mönö kapaŋ köla tourupŋinaŋgö keu baŋŋe anda uruŋini nupnön ala ölöpnjanök memba malme. Mönö mewö jim kutuba kusum eŋgiba malman. Mewö.

Buŋa keu jim sohogetka urukönöp akeŋuk.

³Kembunini Jisös Kraistnön urugö kölguliguli akingöra Buŋa keuŋi neŋgiyöhi, neŋön mönö miaŋgö dop ambazip ölöwakŋegöra kusum eŋgimakzin. Kunŋan Buŋa keu ölni qiwitipköba keu kambaŋi murutŋi ambazip kusum eŋgimakzawi, yaŋön mönö kopa akza.

⁴Yaŋön sileŋi mem öŋgömökzapmö, keugö könaŋi qahö möt kutuza. Qahö möt kutuba mötnariŋkö keu kambaŋi kambaŋi jim melenqeleŋda jitnakölik ahumapkö köpösöŋgömökza. Mewö möta tosatŋi yembuk möndömkösök aketka ölni kewö asuhuma: Likeplikep urunön mututqutut aŋgururuk ak aŋguba uruŋeŋe keu töhöreŋ jiba mem bölim aŋgubepukö sömbu mötmöt akze. ⁵Mewö aka mötmötŋini sohoi kahapmahap aka malmal ölnaŋgö könaŋi siŋgiba kewö mötmörimakze, ‘Urunön kölguliguli ahinga miaŋön döpnini aiga miaŋgöreŋ tiba moneŋ inap miwikuŋabin.’ Mewö mötmöriba tokoba sundan dop jitnakölik eraumakze.

⁶Mewö ahakzemö, neñön Anutu Buñañangö kölguliguli aka moneñ inap ahöm neñgizawi, miañön uru luai qem aņgumakzin. Uña Töröñan döpnini aka mem böñjön ak neñgimakzawañgöra mönö ölna oyaañkoyaañ ketañi miwikñaiba simbawoñ maljin. ⁷Miañgö könañi kewö: Nini mutuk böröñinan yuai kun qahö memba öne töhön gölmenöñ asuhuin. Könañgep mewöyök börötak kömumba gölme ki mosöta anbin. ⁸Mewö anbinmö, nalö kewöñe nene aka opo maluku ahöm neñgiiga miambuk mönö mem böñjön aka luai qem aņgumakin.

⁹Mewö akinmö, ambazip moneñ inap ketañi miwikñaibingö mötzei, yeñön mönö esapesapnöñ simba ewö tötekögetka eta eņgumakza. Eta eņguiga sihim kömböñañini bölöñi bölöñi mi gwötpuk ahuba uru eņololoñ mem eņgigetka kezapjupjup ahakñe. Sihim kömböñañini goņgoñi mieñön mönö öröm jöhöm eņgigetka ulupköba köndeñmöndeñ miwikñaiba ayuhume. ¹⁰Moneñ inapkö sihim kömböñañi miañön mönö yuai bölöñi pakpakö jalöñi akza. Gwötpuk yeñön moneñ inapkö urukönöp möta lilikqilik aka jañjuñ aketka mötnaripñinan pömsöm qeiga lañ malje. Urukönöp möt bibihigetka miañön mönö wösöñini qösöñniga sihimbölö gwötpuk möta malje. Mewö.

Polnöñ Timoti nupköra jim kutum wañgiyök.

¹¹Gwötpukñan mewö maljemö, Anutugöreñ azi gi mönö yuai mewöñi mi qizingöba andö qeba malmal kewöñi malmangöra kapañ köla malman: Ahakmeme diñdiñi wuatangöba Anutugö malmal köhöikñi kölguliba malman. Mötnaripkö kölguliguli pöndañ memba ambazip ölna jöpaköm eņgiba malman. Mönö kapañ köla köhöiba kinda ambazip guñböñjönjön qakñe ek eņgiba malman.

¹²Mönahot aņgolat azinöñ aoņgit miañgöreñ luhut almapköra ösumñi pakpak qezaköba anjawi, gi mönö miañgö dop mötnarip kölguliba aoņgit aködamunñambuk miañgöreñ köhöiba pöndañ bim qeba malman. Anutunöñ malmal köhöikñe aņgotmangöra goholöhi, gi mönö malmal mi buña qem aņguba qekötahöba malman. Malmal köhöikñañgö buñaya akzani, göñön keu mi ölöpñanök jim miwikñainöñga gwötpukñan mi möta ölöp nañgöba jimakze. ¹³¹Anutu yuai pakpak mem gulimakzawi, gi mönö yañgö jeñe könañamgi jim miwikñainöñ aka Kraist Jisösgö jeñe mi mewöyök jim miwikñainöñga mörök. Jisösnöñ premiö Pontius Pailötkö jemesoholñe könañamñi jiba keu ölöpñi jim miwikñaiyöhi, mönö Kraist yañgö jeñe kewö jim kutum gihizal:

¹⁴Gi mönö Buña keu kölguliba pöndañ tem köla wuatangöba malman. Mewö malnöñga kunñan siñgiba bölimanangöra aka keu jim gihimamgö osima. Kembunini Jisös Kraistnöñ kunbuk asuhumawi, nalö sutñi kiañgöreñ mönö urugö nup mewö memba malman.

¹ 6.13 Jon 18.37

¹⁵ Anutunöŋ oyaenjkoyaen Tonj aka nalöŋi ali kam kuŋguiga miangöŋreŋ Jisös Kraist melaiiga aukŋe asuhuiga ekin. Anutunöŋ nanŋök Öngöŋgöŋamnini aiga köreŋŋan yaŋgö nembö bapŋe kinjin. Yaŋön kin kembu yeŋgö Kembuŋini aka pom jembon yeŋgö bohonŋini akza.

¹⁶ Anutu, oyaenjkoyaen Tonj yaŋön mohot nalö kunöŋ qahö kömuma. Yaŋön asakmararaŋ mire euyaŋgöŋreŋ maliga körek neŋön naninak miangöŋreŋ öngöbingö qaközin. Gölmegö kunŋan i jeŋan qahö uba ehök aka ekŋamgö osiza. Yaŋgö qetbuŋaŋi möpöseininga kukösum Tonj aködamunŋambuk aka nalö teteköŋi qahö yuai pakpak galöm köla malma. Keu mi öljä.

¹⁷ Ambazip pomŋi nalö kewöŋe gölmenöŋ öngöŋgöŋi maljei, göŋön mönö i kewö jim kutum eŋgiba malman: Sukinapnöŋ nalö kungen qahöwak teköma. Miangöra yeŋön mönö uruŋini miangöŋreŋ kude ala malme. Sukinap qakŋe kindä aiweliköba söŋgöŋörqök akze ewö, jörömqörömŋinan mönö pömsöm qema. Uruŋini gölmegö ainemalukunöŋ kude almemo, Anutunöŋ yuai pakpak miangöŋreŋ köyan köl eŋgimapköra al mambötketka dop kölma. Anutubuk qekötahöba kingetka ölop yuai könaŋi könaŋi malmal söŋgaibingöra keleŋmaleleŋ neŋgimakza.

¹⁸ Kewö jim kutum eŋgiba malman: Yeŋön mönö nup ölopŋi ölopŋi jegep kindä memba mewö miangön aködamunŋinambuk akŋe. Anutugö jeŋe aködamunŋinambuk aka amqeba jöjöröba tosaŋi bauköm eŋgiba kalem sehiba mendeŋda malme. ¹⁹ Mewö Anutugö jeŋe qetbuŋaŋinambuk aka malmalgö guli dötnam öljä miwikŋaiba mem sehimakŋe. Guli dötnam mewöŋi mi malmalgö tandö wötŋi köhöikŋi akza. Mi mem sehiba galöm köla ölop könaŋgep tandö wötŋi miangöŋreŋ naŋgöba kindä malmal ölbölŋi buŋa qem aŋguba malme.

²⁰ O Timoti, Anutunöŋ möt narim gihiba nup memegö mötmöt kalem uruge alöhi, mi mönö nupnöŋ ala sohobapüköra galöm memba malman. Gölmegö keu oyoŋdewedewet omani aka aŋgururuk supapköba jigetka sohomakzawi, mi mönö mosöta andö qeba malman. Tosatŋan “Mötkutukutu eraum mötŋin,” jiba keu sinŋi sinŋi jim sehiŋetka anakza. Mötkutukutu öljä mi mewö jim sohomakze. ²¹ Tosatŋan mötmöt sohosohöŋi buŋa qem aŋguba jim miwikŋaiba jaŋjuŋ aketka mötnariŋŋinan söŋörauba löwöriba sohoyök.

Anutugö kalem möriamŋan mönö embuk ahöma.